



Nongpokphaijang Kochuam Lawplut : Feb 5, 2021



T. Munjang Kochuam Lawplut : Feb 10, 2021

To, _____

IF UNDELIVERED PLEASE RETURN TO

Manipur Area Office
P.O. Box - 107
D. Phailian
P.O. Churachandpur - 795128



FEBRUARY 2021

Monthly Christian Magazine HINNA VÂK

AN ORGAN OF THE MPCS MANIPUR AREA

SUA PAT KUM MARCH 2008



KHRISTA GINGTU

- Nanghaw le Chiamang La Nuam Pua'u em?
- Lal Jesu Hepi leh a Nasep
- Nehemiah

Editorial, Sermon, Kochuam huang, Khanglai Huang, Programmes etc.



NANG THU HI HEN! PA NANG THU HI HEN!

Pathian mapuina zal in Hinna Vâk mangcha Pathian na i sepnau le a chia tha thei zel ah kipak a um khawpmai hi. Kumbul kipan lim i hiu ah, mi zosia buai kipan a hi ti kihezang kawm in zia kum sungah i loma ding te, i nasep zat chuam chuam leh i zilna ding te zuanah kuama kingaisaktua man le umlo khawpah hun i mat laiun, buaina zosia sufel thei leh buaina umlona lamah ei pui thei Lalpa lam nga ah kumbul hi pat gaw chiat hitiu.

Thilpha sem nuamlo i um pua, thagau lam malsawmna dawn nuamlo le i um puau; maleh thagau lam malsawmna hi eimau ti dan ah dawn i gaw sek ua, thilpha hi le eimau in pha i sak danah bawl i gaw sek ua kibawl khial sek a hi.

***“Nang thu hi hen pa nang thu hi hen,
nang bel sekpa la hia kei a tung ka hi.
La dawî gual takah la sek ding in
la ma’n ka hung kipia’i”***

ti hi kilat thakna’n mang leuhen ti i kidawisak hi. Lalpan mal hung sawm ta hen.

Rev. S. Lama Vaiphei
Editor



KOCHUAM HUANG

Hinna Vâk Editorial Board 2021-2023

October 15, 2020 ni ah Jt. Presbytery meeting chun 2021-2023 sungah Hinna Vâk Editorial Board ding a nuai ah gual hin a guat hi: Rev. R. Lalhminganga, Rev. S. Lama Vaiphei, Rev. K. Jama Vaiphei, Rev. Hesei Vaiphei, Rev. Th. Samuel Vaiphei, Upa Lalminsang, Upa S. Lalpi, Secretary CKNP, Secretary CKKP leh Business Manager dingin Office Assistant i/c Literature hi ding a hi.

Finance Campaign

January 28, 2021 ni ah Finance Committee chun Manipur Area huap ah Finance Campaign nei ding lemsak ahia, a nei ding dan hi kumdang tawh kibanglo deu ah group bangzat ahem siamin Bial huap ah Finance Seminar nei masak hi'ntin, kochuam mal chuh phak thei tiang tiang phak ding, Bial lawi upa lamin guanggalna a la siam ding ua ngai a hi.

Pastor Quarters thak

Trust Committee lemsak-pina dungzui in Vaiphei Enclave ah Imphal Pastor Quarters ding sakzaw a um, Rev. R. Lalhminganga Administrative Secretary in a hawn tak chu Bialtu Pastor in Feb.,16, 2021 ah khan a lua thei ta, Bial miten theitawp a sua ua mellawm tak ah sak ahia kipak a um khawpmai hi.

S. Munnuam Pastor Bial thak hawn ahia, Quarters mun ding le mun lemchang tak chawkdaw a hi ta bawk hi. Trust Committee in mawpawtu ding guanggal in Quarters le sak pat ngal ding ti a hi.

Sunday School Award

January 15, 2021 ni ah Sunday School Committee chun kipakman leh Award zia gual hin a guanggal hi.

- (1) Honors mark mute Kipakman 2020 piak ding dan: Certificate tawh Subject Bu piak ding.
- (2) Award piak ding dan

(a) Silver Jubilee Award:

Kum 25 sung a kizawmah

Hinṅa Vâk

zilsaktu ah pangte kiang ah zia chawihawina hi Certificate tawh Bible piak ding.

(b) Golden Jubilee Award: Kum 50 sung a kizawm ah zilsaktu ah pangte kiangah Certificate (frame siamsa) tawh Bible piak ding.

(c) Thangkai Award: Kum 10 sung kaikim zosia te kiang ah zia award hi Certificate tawh piak ding.

(d) Lungpau Award: Kum 15 sung kaikim zosia te kiang ah zia award hi Certificate tawh piak ding.

(e) Watkin Robert Award: Kum 5 sung MSSU Pathian thu examna ah honors kipakman la zawmte kiangah zia award hi Certificate tawh piak ding.

Rostad Memorial High School malakna

I gam ah hipi boruak le a hung kithial deu tak tawh kitawn in Rostad Memorial High School ah le admission hawn a hi ta. Manipur Area kochuam mi leh sate chun i

cha leh nau teu kaisak chiat ding in i kichial ua, a bik tak in Manipur Area Office ah law la semtute zosia chun a lo theilo gual ah ngai dingin i kisawm uh a hi. Zilsaktu suanum tak tak ten school dang sang ah situm keilo ah a etkawl uh a hi. Semtute leh midang pawimaw diak ten a chateu a kawina ding uh hostel siam ding ngaitua a hia, 2022 session bek ah mat man a hi ding kinep a um hi.

Kochuam thak

Tu sawngin Pathian malsawmna kochuam a kibelap zel ah, Lalpa chu pakin um ta hen. Kochuam kibelap thak te chu B. Phainuam Bial ah um dingin Nongpokphaijang Kochuam, Inkuan 14, Dan zokim 27, Kochuam Upa 2 leh member zosia 77 chu February 5, 2021 nikhan Bial Chairman Upa C. Mangpi'n Branch Church hi dingin a lawmlut hi. Zia hun ahin Sharonphai Bial Lapawl, Leilon Bial Lapawl leh Imphal Bial Lapawl ten Pathian chawihawina la mawi tak tak a sau in, kipakna ankuang tawh zaw a hi.

February 10, 2021 ni khan T. Munjang kochuam chu S. Kawtlian Pastor Bial ah um ding in Rev. R. Lalhminganga Administrative Secretary in a lawmlut kit hi. S. Kawtlian Bial Lapawl, Kangvai Bial Lapawl leh Manipur Area Choir ten Pathian chawihawina la mawi tak tak a sau ah, a chiakhawm ten kipakna ankuang sawkkhawm in lim takin kikhen a hi.

Revival speakers lak leh kisukthakna

January 13, 2021 ni ah Revival Committee thupukna dungzui in kum 2021 Revival Speaker ding in Bethel Team Speaker Pu Kamjathang, Hermon Team Speaker Tv. ST. Satboi leh Jericho Team Speaker Tv. M. Sasang te guatnawn a hui. Speaker leh a team member teu zosia huapin February 2, 2021 ah khan Gilead Tang ah Kilatthakna programme mi 27 in mat a hia, Resource person ten thugenna a nei zaw sîn ua leh Discussion neipi zel ahiu a, nitaklam in ankuang sawkkhawm in lim takin programme mat zaw a hi.

Pro Pastors' Orientation

Akhatveina hi dingah Synod in Pro. Pastor Orientation mani mun chiat ah bawl ding a ti tawh kitawn in February 3-5, 2021 sung a khan Manipur Area Office ah Orientation nei a hi. Zia hun ahin, tukum chu Pro Pastor pakhat bep nei i hia, amau â ding ah le pawimaw tiin Revival Speaker te le ngâitha ding ah chial ahiu ah, a hung pangkim thei ua kipak a um ma ma hi. Resource person ding ahin i pastorte ban ah Manipur Synod pastor te le huap in mi 14 guat ahia, a tam zaw ten paper hawitak ah ziakin class gun tak ah nei a hi. A tawpna in AS Room ah pauchapna tawh thakdaw a hi tau.

Phailianbung ah zinna report

January 25, Seppatni khan Phailianbung pha dingin Rev. R. Lalhminganga Administrative Secretary leh a team te Pu Sasang Driver, Upa Khuallianmang Chief of Phailianbung leh Rev. S. Lama Vaiphei, Co-Ordinator te chu zingkal matakin Guite road haw in ka kipandawk ua, a

Hinṅa Vâk

zing in Tipaimukh road hawin dam takin ka kile kit tau hi.

- (1) Phailianbung bial Umtal, B. Munpi leh Thiakbung le ka hung taw man u'i.
- (2) Phailianbung kochuam mipi zosian vawk 1, sangal 1, sakhi 1, kelcha 1 leh akcha bang hem zat that in ei la ngak u'i.
- (3) Nitak dak 2 vel in ka tung ua, pastor pa makaina tuililui ah ei ksilpi ua, upa te in haw ka tawkual nung un 4pm in lim takin luai ka the u'i.
- (4) Zanin ka kikhawm ua, A/S in NUN FIMKHUR ti thupi mangin thu ngainawp um tak a gen hi.
- (5) Zingkal in Phailianbung nupi ten bâl, zawngta leh me ding dang dang a hung chawikhawm ua, kipak a um khawpmai hi.

Bialtu Pastor Rev. Siamlaron leh kochuam upaten lampi haksatna tiang ei dawn in, a haksatna tiang ma ei thak ua ei buaipu nasau ah ka kipak takzet u'i. Tichun, khualzin lawtingin limtakin

Suantak road ah hung kalto in, Phunchongjang, Tuilileibul leh Maite le hung fang malam in ka hung kile tau hi. AS sermon chu nu leh pa ten a lawkpi ban un, Synod motor leh AS ngei in khawsung a hung taw chu a la kipak ma ma ua, zin man a um takzet hi.

Mizoram kochuam te le kikhawm ta

February 7, 2021 Pathianni a kipat khan Mizoram sung kochuam ten le kikhawpna a pan thei tau ah, Pathian lungsiatna zalin vaihawmna leh kikawmtua dan le hung hawi deu deu ta ding in kinep a um hi.

Semtu pani sîn thu

Tu sawng in kochuam in malsawmna tamtak i dawn zingh lai in Pathian lalgam ah i naseppi uh Upa, Evan. Lamkam (L. Kama) of Kangvai leh Rev. Khualzakap of Kangvai ten kumtuang gam ei la zaawt san tau ah, a nutsia'u insung mite i sunpi ma ma ua, Pathian in a thamuan zui zel ding i dawisak uh a hi.

Office Staff Retreat

February 15, 2021 ah khan Office Staff te'n Retreat cum Outing, Siktui Farm & Resorts ah a mang u'i. Zia hun ahin Administrative Secretary Rev. R. Lalhmingsanga'n hunpi mangin, Manipur Area Office ah sêmtute chu amau mazawn chiat ah ginum leh kukal tak ah sêm dingah kipumpiak dingin a tîlkho a. Chuleh, semtu zosiate chu kihépitua tak leh kihothei dial dial ah sêmkhawm dingin a fui bawk hi. Nitak ah Refreshment nekkhawm a hi zaw in kikhen a hi.

Lekhabu Hawna Nei

February 16, 2021 ah khan Pastor C. Lalngaihawma'n a zia, *Insung Maichâm* kiti lekhabu chu Rev. R. Lalhmingsanga, Administrative Secretary in a hawng hi. Zia hun hi Thangkai-Lungpau Hall, Manipur Area Office ah mat ahi'n, a lekhabu le Kochuam mite â dingah nisin Insung Kikhawpna dingah panpitu pawimaw tak a hi dungzui in, a tam thei pen ah hawm zak in, zawkdaw pan ngal a hi. □

SUKDIKNA

Business Manager kisân zia kin January 2021 issue ah sukkhial pawî tak a hung kinei kit ah —

Bible mang phachuam hitiu ti zia ktu kha Pro. Pastor H. Lamthianmuan, Panglian Pastor Bial a hia, chuleh,

Pilvang Takah Hinkhua Mat a Pawimaw'i ti zia ktu kha Pastor Summinlian, Delhi Bialtu Pastor a hi.

Sukkhialna thu ah simtute leh a zia ktute kiangin ngaidam ka hung dawn hi.

~ Editor



KHRISTA GINGTU

(Faith in Christ)

~ Pro. Pastor Lallunglian Vaiphei
Mata Pastor Bial

Galatia 6:14-17: “Kei vang in, I Lalpau Jesu Khrista kros longal chu ka suan lo ding zia mai chu; ama ziakin khawvel hi kei a dingin khetden in a um ta’n, kei le khawvel a dingin khetden in ka um tai. Kisiam thak kitna longal ah chun zektan hi bangma a hipua’n, zektanlo le bangma ahi diak puai. Zia dan gual ah um tapote chung ah chun chamna le jangaina um ta hen. Tu’khel vang kuama’n ei subuai ta kiu hen; ka taksa ah hin Jesu teptena chu ka paw ta ngal a.”

Amasa’n **Hinna Vâk** mang a Pathian nasem thei ding a ei puitu Pathian kiingin kipak thu ka gen a hi. Chuleh, zia thu ziak ding a dawisakna ei piate chung inle kipak thu ka gen hi.

Tuni hin, “Khrista Gingu” ti thupi mangin, Khrista gingu-tute chun a ginuh chu tudet zing a, zia ginna a chu kinga’, a hinkhua pumpi chu Khrista ginna puihuaisak ding a hi dan tamlo hun ziak ding ka hi.

Galatia 6:11 apat i et chun Galatia khua gingu-tute lakah khawvel leh taksa lam a kidaidanna nasa tak um in, zektanten zektanlo Jentelte chu zektan phut in, taksa dan a zektan a hinau a kisanpi danteu chu Paul in a genchian a, gingu-tute chu kikhenchuamlo ah kicham leh kipumkhat

takah a khan theina ding un, ginna kinga Khristian hinkhua’ pawimaw point 4 mangin a gen hi.

1. Khrista leh a kraws bep suang:

Chang 14na a hin, Paul in “I Lalpau Jesu Khrista kros longal chu ka suan lo ding zia mai chu;” ti’n, a gin i Lalpau kraws chauh suang a hi dan chian takin a taklang hi. Paul hin suan ding hawi tak tak Juda mi (Pathian namtel) a hinata, pilna leh Dan thiamnate nei maleh, Khrista gingu a hung hi apat khan, a gin Khrista

leh a kros lam chu thil zing in zia bep cha chu a kisanpi ta a hi. Ziaziakchun, Galatia Kochuam ah “nang leh kei”, “ting leh tinglo” (zektan leh tanlo) ti a gingtute a buai lai un le Paul chun a gin Pathian bep chu suang in a buai velo a hi. Paul hin Juda mi ahina leh Dan thiam ahina a kisan

pi pua, zia chun Pathian Lalgam na a sepna ahin ama hina leh din mun a suang lo zia a sulang chian ma ma hi. A hina leh dinmun suanglo ah Pathian bep suang a Lal na a sep ziakin

Galatia kochuam te â ding in malsawmna leh thamuanna tuntu, gingtu kituaklote kipumkhat saktu, Lal nasemtu pawimaw tak a hung hi ta a hi.

Tulai hun a ei uh gingtute hin le Pathian Lalgam na i sepna a hin suan ding tam tak i nei chiat u’i – thiamnate, Kochuam, Bial leh Area a dinmun leh mawpuaknate. Ziagual a dinmun chuam

chuam Pathian Lal gam nasepna i tuk leh i chan teu i kisanpi tak zia un, i kochuam hi a khan ding gual a khanglo in, kikhen dan na, nang leh kei, fel leh fello, thiam leh thiamlo, tin leh tinlo ti’n, Kochuam Biak In khat a lawikhawm hi ngal a pangkhawm thei kei lo i tam ta ma mau a hi. I Lalpau

*Pathian in ei piak
Hina leh Dinmun-te
hi kisanpi mai lo
in... gingtu chanpite â
dingah malsawmna
leh thamuanna tuntu
hi dingin theitawp
in pan la’n, gingtute
kipumkhatna ding in
sem hitiu.*

Jesu Khrista chun Pathian chapa ahina suanglo in, kingaitawm leh thunuaigawl tak in khawvel ahin Pathian a sawltu dawi gual in na a sem a hi. Ziaziakchun Khrista ging-

tuten le Pathian in ei piak Hina leh Dinmun-te hi kisanpi mai loin, ei sawltu leh ei piatu Pathian bep suang in, gingtu chanpite â dingah malsawmna leh thamuanna tuntu hi dingin theitawp in pan la’n, gingtute kipumkhatna ding in sem hitiu.

2. Khetden Hinkhua:

Paul chu Khrista gingtu a hung hi apat khan Khrista kros chu ama a dingin khawvel

Hinna Vâk

khetdenna leh ama khawvel a dingah kikhedenna a hung hi ta ahi. Zia hin Khrista kros chu gingtute a dingin gitlo khetdenna leh gitlo apat mani kikhedenna ahi ti chian tak in ei hil a hi. Khawvel chu Paul a ding in khetden ahia, Paul le khawvel a ding in khetden ahi tak ziakin, khawvel leh Paul chu kizuan tua in munkhat in na a sem khawm thei talo uh a hi. Ziakiachun, Paul in a khawvel hinna leh thiamnate chu kiletsakpi leh chapopi thei talo in, kingaitawm tak in Juda leh Jentel (mifel leh fello) khenchuam loin midangte a dingah malsawmna leh thamuanna tuntut hi ding in kisuannate leh 'Kei' kitina te pai in Pathian na a sem thei a hi.

Ziagual ma chun ei haw gingtuten le i Lalpau Jesu Khrista kros lam en zing in, i gitlonau leh tinlonateu bep khenden loin, mani mimal chiat hi le khawvel a dingah khetden i hui ti kihiai tiu. Paul in a gen kikhedenna pani hi gingtu hinkhua thasuak loah i tuk det zing chun, i pianpi khawvel gitlonate – midang sangah mani kingai

pawimawna, mi dang phatna sangah siatna/tin lona mu leh gen chinte, leh a dang dangte, i kochuam, gamsung leh khawtang subuai a kituak lona siamtute hin awl awl in ei zamsan ding a hi. Gingtu i hinau tudet zing kawmin i chung ua mawpuakna kingate hi Pathian min lopina ding bep ah sepdaw tup tin ten lehin, Lalpan i nasepnau chu hun malsawm ngei ding a hi.

3. Kisiam Thakna:

Chang 15 leh 16na a hin Paul in Khrista ginna chu siamthakna pang loin bang ma ahi pua, kisiamthakna chun chamna leh jangaina a tun hi tin ei hil a hi. Paul ngei kha le ginna siamthak ahung hi phat in Gingtute man a sugentheitu kha Gingtu chanchinpha gentu a hung hi ta, a hinkhua chu a pumpi'n siamthak a hung hi ta a hi. Siamthak ahi nung in Paul chun nidangah a kisuanni leh a chapopi a hina leh a thiamnate mangah gingtute subuai leh sulau thawng ta loin, chamna leh thamuanna tuntut a hung hi zaw ta a hi.

Zia tak chang hin chian takah ei hil chu gingtu hi ngal

a kisiam thakna nei lo chu bangmalo mai ahi. Galatia khua Juda mi gingu kisiam thakna nei lote chun zektan leh zektan lo kikal in ginguote lakin buaina a siam zing lai un, Paul chun vang zektan ahina ala kisanpi ma ma chu siamthak ahi phat in ama a ding in bang ma lo mai ahung hi ta, zektanlo Jentailte lak in le chanchinpha gen in, khi chuam nei lo in Pathian na a sem thei ta ahi. Zia zia chun Tulai a gingu ten le i kochuam leh i nasepnau mun chiat a khi chuam nei lo a Pathian na i sep theina dingin kisiam thakna zia chu Khrista ginna zia ah, lungthim ngaituana, i thil thil dan, thil pawm dan leh nisin hinkhua zat chuam chuam a kisiam thaknate a hi.

Tulai i kochuam ua buainate chu zektan leh zektan lo lam ahi pua, kochuam a ding a fel leh fellote, kikhawp ngaina leh ngaina lo deute, Zu leh Khamthei chingte leh ching lote... kikal a kikhin dan leh kikawi chuamte hi i buaina pen uh kochuam ei kipumkhat sak thei lote chu a hi pen hi. Ziagual a khawvel

lam thil chuam chuamte zia abuaina neu cha cha i lak a umte hi, gingu i hina zia a kisiam thakna nei chiat leuhin (a diak in a lang a mawpuakna nei ten) i kochuam hi khi in mipite kipumkhat ding i hiu.

4. Taksa ah teptena

Paul in chang 17na a hin, Khrista a ding a tepte ahi zia in, bang man a suk buai thei tak lo dan a gen a. Zia hin amau hun lai ah Suakte taksa chungah apute'n teptena a siam piak sek uh chu mang in mi hiat thiam thei ding in a gen hi ngei ding in ginchak a um hi. Suak a chal ki ahem a khut ahem, a bil ahem a tepte na nei te chu min amuu in a nei tu um ahi ti a he ngal thei sek a hi. Ziagual ma chun Khrista gingu chu Khrista â a hia, Jesu teptena a puak ding zia chu miten ama Khrista â a hi ti a hiat ua a sukbuailona dingu ahi.

Tulai khawvel ahin, Gingu te'n Khrista teptena chu i taksau ahin bang tin pua'n, mite musak thei ding i hiu em ti hi i ngaitua a pawimaw ta a hi. I khawsaknau mun chuam chuam ahin nek leh chak hawlnate, sep leh bawl

Hinṅa Vâk

chuam chuamte, thiam zilna mun chuam chum a i kithezak nau ahin, Khrista a hi nau su lang thei pen teptena chu- i kicheina/kicheidan, mi i dawn-sawn dante, i nek leh chakte, i holim dante leh thil dang tam tak i nisin hinkhua mat dan ahin Khrista â ding a tepte-te i hinâu i suklat dinguh a hi.

Thukhakna

Kuan le Jesu Khrista chu a hung ging tak tak phat le, zia khawvel a hin, suan ding leh kiletsakpi ding bang gualin tam nei ma leh a nisin hinkhua a lopi pen chu a gin Khrista a

hi sek hi. Ziagual a mani mimal hinkhua Khrista a lianpen leh lopi pen a hi theina ding in, kros a khan khawvel gitlona leh ei ma khawvel a dingin i kikheth den a ngai a, zia chun hinkhua kisiamthakna ei pian, hinkhua limna leh thamuanna i chang thei hi. Chuleh ziagual a gingtu hinkhua hung mang gingtute chun kenchuam neilo in Lalgam na sem in, midangte'n le amau chu Jesu Khrista â a hi ti a nisin kimat danuh leh khawsak dan un a mu thei un, Khawvel buaina tam tak apat inle buailo in thamuanna leh malsawmna tuntu a hi zaw sek u'i.

Naupang pakhat hi kithalawp takah tuizap ding kisa'n, tui lakah a chawplut ziang leh Awle umna'n a chawmlut kha, a nu'n a del a, a chapa chu kaidaw ding gua in a bân in a kai a. Awle chun a chapa kêng a pet a, a kipuaitua tau hi. Kâ tawh kiko tawh tia chu awle tawh a kipuaitua'u husa chu a kiang ua mi pakhat in a hiat phat in a va del a, zia nuchan te chu a va hukdawk hi. Naupangpa chu Awle'n a pê liamnate ziakah chun Hospital ah hun sawt tak a kikaitua nung in a hung damdawk kit a, beliam mang ziang talo ding bangzat ahem a nei ta. A lawite'n a kêng ah beliamte chu a gen phat ua leh, ama chun, "Ka bân ah le beliam tampi ka nei hi, ka nu'n ei la thasuak nuamlo zia kin ei la tûkna beliam tam tak a um hi" a ti sek hi.



‘NANG HAWLE CHIAMANG LA NUAM PUAU AH AHM?’

(John 6:25-27; 53-58; 60-69)

~ *Pro. Pastor Khuplemlal
Lamka Pastor Bial*

Johan lekhabu hin, Chachinpha bu dangte tawh kibanglo deu in Lal Jesu thilmak bawlte hi thilmak gualah genlo in, teptena gualin a gen sek a, zia chu Jesu Khrista chu Pathian mi sawl a hina te, Pathian Chapa leh Pa tawh pumkhat a hinate teptena leh etsakna ahia. Zia hi chanchinpha bu dangte sangah chanchinpha Johan zik a danglam bikna langsal takmai pakhat chu a hi. Chanchinpha Johan zik bung 6 thu hi a sau khawpmai a, chang 71 hial a um ah. Ziaziak ahin mithiamte chun lawm chuamchuam in a khenzak ua, zia gual deu a chun tuni hinle lawm lianpi pi, lawmli in vak khen leuhin.

1. Bung 6:1-21 sungah hin, mipi sangnga Lal Jesun, a va’kna thu leh tui chung ah kengah a chia thu i mu thei a. Mi sangnga vak thu hi chu, Lal Jesu thilmak bawl langsar leh lartak pakhat chu hi ngei ding in ginchak a um a. Jesu thilmak bawl lak ah chanchinpha bu zosia ah, a zik vek u chu, zia mipi sangnga vak thu hi ahi. Mi sangnga va’k thu hi chu Galilee dil, Tiberia dil a ti tho uh, lui kam ah mipi tamtak hiat leh muah a bawl ahia, tui chung ah keng ah a chia a hileh chu, a nungzuite mu leh

hiat chauh ah a bawl a hi ti i mu thei u’i.

2. Chang 22-24: Jesun thilmak lopi tak tak te a bawl ziakin, mipin a hawl thu’u i mu thei a. Bung 6:2 a chun, Lal Jesu’n damlote chungah a thilmak ahite chu a la mu ziak un, mipi tamtak in ama a zui thuu i muu ah, zia ti gual tuk ah mi sangnga, vaithum pek 5 leh sanga 2 chauh mang ah a vakva nungin, Lal Jesu chu mi mai mai a hi puai, ti hian zawlnei hung ding (Messiah) a hi ngei ding a gingchau a, Lal ah siam a gaw ta hial ua, zia

Hinna Vâk

chu Lal Jesun a hiat in mipite chu a nusia ta, himaleh, mipite chun Lal Jesu chu mu ngei ding guan, Kapernaum khua tiangin a hung hawl zui tau ti i muthei kit hi.

3. Chang 25-65: Lal Jesu'n hinna vaithum a hi thu genin, kumtuang hinna thu a zilsak a, zia chang ahin Lal Jesu'n ama chu, hinna tak tak mihingte kiang ah pe theitu, van a kipat hung suk vaithum a hi thu chu a hung kipuangdawk ta, a thilmak hite mai mai kha buaipi lo ah, ama chu hinna tak tak a nei theina ding ua, a thute zawm ding in a zilsak ah. Zia chang ah hin, Lal Jesun ama chu hinna a nei theina ding ua hung a hi thu leh, hinna a nei theina ding ua a taksa chu ne a, a thisan chu dawn ding in mipite a zilsak a, mithiamte chun zia thu hi *Eucharistic language/discourse* ti tein a gen sek u'i.

4. Chang 66-71: Jesun hinna thu tak a gen phat in, mi tamtak in hethiamlo in, zawp haksa ti in, Lal Jesu zilsakna chu a hiat thiamlo bep uh hilo in, thil hithei lo tawp gual in a ngai ua, khenkhat te diak diak

chun a taksang thei puau ah. “Zia mi hi Joseph chapa kha hilo a hi em, a nu leh pa le i hiat u kha, van a kipat ah hung suk ka hi, bangatia kiti ahem” ti in a ginglel uh a hi. Zia phat a chun, Lal Jesu zuitute lak a khenkhat te chun a nusiau a, Ama, i Lalpau Jesu chu zui talo in a chia mangsan tau hi.

Zia phat a chun, i Lalpa Jesun le, a nungzuite kiang in “Nanghawle chiamang la nuam awm”? a tia. Zia dawtna chu sang ding in, Peter chu a hung pau dawk a, a dawnhuna hi a lopi khawp mai, Lalpa kua kiangah chia ding ka hiu em? Nang in kumtuang hinna thute chu la nei hi. Nangma hi Pathian mithiangtho chu la hi ngei hi ti ka hetau in, gingle ka hung gingcha tau hi” a tia. Zia lai tak ah Peter paukam mat “Nangma hi Pathian Mi thiangtho” (**the Holy One of God**) chu la hi ti hi, Lal Jesu hinna genna title pakhat a hia, chanchinpha Johan ziak pumpi ahin zia lai tak chauh a hin a ki lang ahi.

Zialai takah, Johan Bung 6 sung ah hin i Khristian hinkhua'u â ding ah thil

pawimaw tak, i zildaw thei ding uh tamtak um thei ding ginchak a um ah. Ziate lakah chun i thupi'u "Nang haw le chiamang la nuam awm? ti laitak hi i ngaitua bik deu ding un a la kisingsai tin, lam chuam chuam in vak thil ta lehin. I gen tak sa gual ua khan, Lal Jesun Galilee leh Judai gam velah na a sep lai a khan, mitamtak in a zui ua, a kiangah hung in, a zilsakna te a ngaithau a, a ngai sang ua, mipi khan Lal Jesu kha a baw in a bawthaw ziang ding un le ginchak a um hi. I Bible chang telnau bung bul lamah i mu chu, Lal Jesun mipi gilkialte vakva in, a daw lamthilteu a bawl piak a, mipiten le a ngai sang maumau a, Lal a siam guan a hawl hial uh ahi. Himaleh Lal Jesun a guk in aki gawl guk san ta ahi ti i mu thei uh a hi kha.

Ziagual lawm ah ama ngaisang ma ma a, a nungzui dupdup a hilai un, Lal Jesun thutak kumtuang hinna thu, zia khawvelah a hung nasan tak, a puandaw tak a chun, tamtak in zawm theilo leh thil haksa tak a ngaiin, a khen te diak diak chun, a awi thei puau a, tamtak

in zui nuam talo in a nusia tau a hi. Zia phat a chun Lal Jesun a nungzuite kiang in, dawtna haksa tak leh lungthim sukha tak a dawng ta, "Nang ule chia mang la nuam puau ah ahem?" tiin. A damlo lai ua a sukdam laiteu leh, a gilkiial lai ua nek ding a piak laite khan chu a ngaisang ten vang un, bangatia a chiamang san ziang uh a ta diam le?

1. Zia mite hi a tisau dawilam leh lawkna ding chauh a Lal Jesu kiangah hung hileu a kilawm u'i.

Lal a siam gaw hialte khan a zilsakna tak tak a hung hiatchian phatun a chia mangsan ta mai uh a hi. A natnateu a sukdam lai leh, mithi a kaithaw laite, gamhuai a nawdaw laite, a gil a kial ua a nek ding a piak laite khan chu a ngaisang ua, a nungzui kha nuam a tiu a, a haksatna ding a hetlo bep uh hilo in, Jesun a chiamangsan nung a khan le a hawl pek uh a hi.

Zia mite hin tulai Khrisianta hi tawh kibatna tampi i nei uh hilo maw? Thagau Thiangtho nasep nasatak in i chang ua,

Hinṅa Vâk

malsawmna le i dawng nasau a, halnate hin le ei chenchil zing ziang ahem ti thei in i um ua. Bangtik ahem chang chun i lim ma ma ua, i gi dung dung ua, i phur ma mau ah, kochuam chiadan leh Pathian thu kizikte le ngaitua vaklo in i limna ding chauh uh leh i lamna ding chauh uh ngaitua hileh kilawm hial in i um ua, bang chu hileh, Pathian kiang ah kipat ah i dawn, Thagau Thiangtho nasep a hi phawt chun a hawi vek, a pha khawpmai hi, thil kipak um leh lumgdam um tak chu a hi. Himaleh, i hinkhuau sunggil lam tak tak hi i kibichian zing uh a ngai hi. Halna, camping, crusade leh revival boruak in ei tuamvel lai ahin chu i lim ua, i kipak ua, phur tak le thatho tak in Biak In kai leh lengkhawm na-a te lam in i ding sup sup ua, maleh hun sawtlo nung leh i hinnau ahin ding det zawlona leh puksiatna ahung um zel sek ah, a da um khawpmai hi.

I Lalpau hi a hawi pen hi, lingluhkuk khuk sak maleu tiin sa in Pathian pak leh chawihawi in um ziang maleu hinle, kingaina sual leh lepguknate, mani kihepina (Hepina diklo)

leh mani limna ding bep hawl a midang a ding le gelpha lo hinkhua matnawpna ten ei hip a, Lal Jesu hi i chiamangsan sek uh a hi. Tuni hin i kingaitua thak uh a pawimaw khawpmai. I Pathian u hin a mite a ding in it a nei pua, a malsawmna simslenlo piak le a it ngailo a hi, ama a dinga kimangtute a ding a chun it bangma a nei pua, a malsawmnan a vuk ngei ngei sek hi, himaleh zia malsawmna bep chu beisei a Pathian na i sep ding uh tina vang a hi pua, zia chu Pathian dawi dan le ahilo him a hi.

2. Zia mite Lal Jesu nusia jiangte hin, Lal Jesu thupiakte hethiam a zawm thei ding in thunuaigawlna tawh ginna a neilo uh a hi.

Thunuaigawlna tawh a kitulut theilo uh a hi. “Joseph chapa kha hilo a hi em?” Lal Jesun kumtuang hinna thu a zilsak chu thu haksa leh hiatthiam theilo ah ngai in “zia thu hi thu haksa tak a hi, kuan dawngsawng thei ding ahem?” tiin a phunnawi ua. Lal Jesu chun chang 63-64 ah te Thagau Thiangtho nasep leh ginnate a

pawimaw thu a gen a, chang 64 ah chun bangkim chung ah vaihawmtu Pa Pathian thu thu a hi thu a gen hi.

Thagau nasepna i chan tak a hi leh chu ei uh le i sang sek uh a hi. I mu leh i hiat, i ngaisanteu hi a chungnungpen leh dikpen in i he sek ua, i pawm tawp mai sek ua. Bible in bangti'n a gen em, kochuam thugin in bangti'n ei hil em ti te sang a chun keima, ahiloleh eima ah a chian dan zawk kha i kawi pawimaw zaw sek ua, ginna leh thunuaigawlna tawh Thagau Thiangtho pui thei ding in Pathian kiang in i kitulut in i kipumpiak zawk uh a ngai hi. Johan 16:13 a chun, "Thagau diktak chu a hung tun hun a chun, thutak zosia ah chun hung pulut in a" ti i mu'u a hi.

I gam i kochuamah gingtu det zolo, piangthak detzolo ti vel i tam ma ma ziang ziak u hi bang ziak a hi ta diam le, i thagau chan u leh, i pianthakna teu hi, Lal Jesun Thagau diktak hilo, chung lam apat piang i hilo ziak uh a hi diam le? Ahiloleh, thagau in thutak ah ei pulut theina ding tiang

ah, i kipiakzaw lo ziak uh a hi diam le tite hi ngaitua a ngai a, sutkham chu a ting hi. Van apat a vaithum hing hung suk, Lal Jesu taksa leh thisan chu i nek ua i dawn ua, ama chiamangsan lo a i zawp zing theina ding un ginna diktak leh thunuaigawlna tawh Pathian ma ah i kituklut ding uh a ngai hi.

3. Zia Lal Jesu chiamang san ah nusia ziang tate hin chan nawplo, chânpallo, nutsia nawplo leh simtheilo, Lal Jesu zuina ding ah daltu hi ngal, a nei ziak uh a hi diam le maw?

Pamaisak, it a nei uh hi mai lo ding maw? Thepna thuak peilo, thepna pumpel nuam, haksatna ma sawn ngamlo a nei uh hi mai lo maw? Lal Jesu hi zui ve a, a na sem ding ah, a ma a ding ah hin i ut tak tak uh ahi chun, thawk na lampi i haw uh a ngai ngal a. Mi khenkhat in piangthak ta chu khawvel sualna leh thepna ten ei sukbuai phaklona lim tak leh kipak tak ah um ziang theina hinkhua gual in i ngai ua, maleh zia chu Lal Jesun ei zilti dan chu a hi pua'i. Lal Jesun "kuanle, ei zui a nawp chun nisin ama kraws

Hinna Vâk

kiput in ei zui hen” (Luk.9:23)
a ti a hi.

Khaile nang leh kei, tulai khawvel ahin thepna genhaksa taktak, thepna haksa tak tak, dawigual, ut zawng, daw zawng, nawp zawng, Lal Jesu apat ei pui mangthei ding thil hi a tam ngei! Khawvel miten khawksaklo leh bangma lo gualah a gel ua a bawl uh, sual tak leh gilo tak gual ah le kilang beklo, piangthak mi, piangthak chate a ding ah hi ding ah lem leh kilawm lo hi a tam khawpmai hi. Nungak tangval nawpchenna leh kingaina, sum leh pai nisin khawsak ngaituana, midangte sang ah neinung zawk nawpna ziak a thil phalo bawl nawpna, mani tuina chauh sukpitin nawpna te, Pathian lau lona leh kochuam ngai pawimawlona te zia kin mi tam takin Lal Jesu hi i vakmang san zing uh hi in a kilang hi.

Pathian thu tawh kime beklo leh gingu, piangthak Khristian te a dingah hi dingah kilawmlo thilte bawl khawksakna nei keilo ah bawl

bawl mai, hi hi mai ta bang a kitam ta. Khawvel mite et a chun a changkang, a nuamsa, a ze, a che thei, a bawlthei, a pa, a nei nung, leh nuam ten di'n le a kilawm hi. Zia zosia kal ahin i Lalpau Jesu chun “nanguh le chiamang la nuam puau ah ahem?” tiin ei dawng zing a hi.

Bangtin ahem i sân ding uh? “Lalpa, kua kiangah a hem ka chia ding uh, nangin kumtuang hinna thu la nei chulam, nang Pathian Mithiangtho chu la hi ti ka taksang tai, hiat le ka hia'i. Khawvel limnaten ei ko maleh nutsia gam ngai ta puang ka, ginum takin, a tawp tiang in la nung zui zel ingka, miten hung nusia ziang leule, kei chun lam tungtawn in hung zui zel ingka” tia sang ngam ding in i kiguanggal ding uh a hi.

Limna leh kipakna, duthusam tam tak Lal Jesu apat ei puimang thei ding zia khawvel a hin a tam ngei! Zia haw zosia lak apat Lal Jesu hi a tawp tiang ah zui thei di'n Lalpa'n a thu malsawm ta hen.



Lal Jesu Hepi leh A Nasep

(Johan 17:15-17)

~ Rev. S. Lama Vaiphei

Thumapui

Kumlui 2018 October tha Chongkhawzo Kochuam ah Presbytery imat lai ua khan zia Moderator na za um tak hi ka ko ah latin a um a, tit leh leh titlo chung chung in tunitak ah valedictory sermon pethei ding ah Lalpan ei puina hi ka ngaitua leh thupi ka sa, Pathian leh Kochuam te chung ah kipak thu ka gen hi. Zia na ka suk pitin thei na ding ah bangkim ah ei kithuapi tu ka seppi te, Office Bearer te leh a bik takin Secretary te chungin kipak thu ka gen hi. Chuleh Statistician Rev. C. Lalrinliana hi Presbyterian Kochuam ah piang ahi tak ziakin ka hiatthiamlo zosia ei hilchian ah adviser phatak ka nei bawk hi ka kipak a hi. Amau haw panpina panglo ahin chu ziana hi ka mualsua thei ding ka ging cha puai.

Chuleh, tuchung i khawmpiu imat theina ding ua a mun entha ding ah Secretary Sr. Upa P. Minthang tawh ka chia lai ua Kawlhen Pastor Bial ten Presbytery zintun ding ah ala kisingsaknau ka va mu ua khan thupi ka sa. Khawmpimatna ding ahin ei chawkp hul un ka tha a muang ma ma hi. Ei la gendan ua chun Tanggam Presbytery kikhawmpidang zosia sang ah Thagau Thiangtho pawlna sang pen i dawn chiat thei na ding uh thiltup ahi dan te, pauchap pawl leh a dang dang te din a, theitawp ah pan ala lak dan

teu ka mu, hausapi leh hausapu ngei inle theitawp a suapi dan teu hin ei su hangsan ma mai.

Khawmpihun chu a hungtung tangei ah, zintun tu ten duthusam sang ah lopi zaw ei la zintun dan teu leh kum upa zaw lam ten le naupang zaw te vaihawmna ti ah ei musit puau a za um tak ah ei hung uap dial dial dan teu haw hi ka mu in ka sunggil lam a khawi kha, i khawmpithupiu “Kipum khat na” chu a lawting ngal hi in ka ngai hi. Pastor te report etkhawmna aki nei a, kumdang sangin pastor ten theitawp a sua ui ti muthei in a

Hinpa Vâk

um a, lungdam a um ma ma hi. Chuleh, bial lam apat finance report etkhawm kit ahia Pathian gam hileh Gamthak te, Tualsung thawlawm tiangin ma i sawn dan teu mu in Finance Committee chun lungdam um a kisa ma ma ah, tuzan ahin Kochuam te i pankhawmnau ahin Lalpa Jesu min in kipak thu ka hung gen a hi.

Valedictory sermon gen ding ah ka kisingsak lai ah ka ngaituana lian pen chu Pathian nâ hi bang ziak ah i sep uh a dia aw? Bang hin ei sepsak ah dia aw? Bang a ti leh Pathian nasem hi ngal ah Pathian nâ gual ah semlo ah, solkal nasem thabeite entawn mai, bang ding ah khawtang nasem te gual ah ki thadâ leh nuak mai thei sek ihi diam uh ti te hi ka buaipei chu ahi. A dawnhuna chu pe zolo ding hima leng, thei dan dan in ala genkhawm hitiu.

1. Changtel hilchetna

Evangelical lekhabu ziaktu minthang John MacArthur chun Jesun Peter kiang ah “Ziate zosia sangin lei hepi zaw em” a ti khan hepina sangpen (total commitment) a phut a, himaleh Peter khan zia sang a niamzaw hepina kam pau chu mangin a hepi

thu in a sang ahi. Peter chun a lunggil zosia ahepi lo ziak ahi pua, hun chiasa ah athiltuak khan hepina sangpen ah ahepi thu a puan ngamlo sak ahi atii. “Ziate zosia” – kiti khan sanga leh a sanga matna nekhawlina hinkhua kha akawk a, Jesun vang Peter kha mihing mantu leh nungzuite hotupa ah siam pitin aguât ahi (Matt. 16:18). “Peter chu a lungngai a” ti hin Lalpa Jesun Peter kianga a thumveina hepina sang zaw (Agape) mang talo ah hepina niam zaw mihing te kihepina (Phileo) zawkin lei hepi em a ti khan Peter lungthim chu a subuai ahi ati ahi.

Mizo pau ah Thuthlungthar Hrilhfiahna bu akhan, Rev. Lalpianga chun Jesun Peter kiang a thumvei hial lei hepi zaw em tia adawt na hin, thumvei ala phatsan na kha phelpiak kit a guat ahi. Amasa a khan a gual leh pai te tawh a kikkaikhin a, midang zosian hung nusia leu le ken chuh... tite kha amang a, tuchung ahin chu mimal tak in kingaitawm takin Jesu a hepi hi ti a sulang ta ahi. “Ei zui in” –ti hi Lalpa Jesun Peter a puikitna ahi. Peter ako masak lai akhan le Lalpa Jesun zia kampau ma hi a la mang hi (Mk. 1:7) a ti a hi.

Theologian minthang Bultmann chun Jesun Peter kiang a “La naupan lai in la kawng la kigak ah la nawp na lam lam in la chia sek a, tuhin chuh la hung upa ta midangin la kawng hun gak piak in tin uh la nawplo na lam lam ah hung kai ding ahiu” ati ahin Peter in a Lalpa phatsan talo ah kross ah thi tiang ah martyr ding thu agenlawk na ahi atii. PHEME PORTEINS chun zia ni hin Peter in a Lalpa thumvei hial ala phatsan takna kha a phelkit (reverse) a hi atii. Ama hepi leh a thupiak zawp (14:15; 15:10) ah ala gen gual akhan, Peter chun Jesu ahepi a; belamte Vâktu, enkawltu, chawmtu, Pastor, Bishop ahem Elder hi dingin anamdet ahi. Zia belamte hi Pa Pathian in a khut ah a ngak kha tuhin Lalpa chun Peter khutin alansawn ahi. Chang 18 na “ka hil la hi” ti kampau hin tun chu la thutiam kha la mualsua hun a hi tai. Thiding hi lechun le lei hepi tak ding ahi. La naupan lai gual akhan la thutiam la nawp hun hun ah phelkit ziang thei talo ding la hi a tina a hi.

2. Pathian nâ i sepna ding zia chu

Pathian nasep hi bang dang zia chu hila ah ama hepina zia chu

ah sep hi Lal Jesu ei tena sang pen chu hin a. Peter in alunggil zosia Lalpa ahepi ta nai ti ahiat in Jesun abelamte enkawl ding in a sawl ahi kha. Jesu hepi chu ilunggil tak ah ama tawh iki zawpmatna genna ahi. I lunggil tak ah ama tawh iki zawpmat nak ua leh thadâ tak ah Lalpa nasep hi umthei puan a. I lunggil tak ah iki zawpmat nak ualeh tuni ah ama na isep uhih itit zia chu, ifel zia chu leh igual chungchuan zia chu hila ah i chung ah a zangaina zia chu zawp ahi ti muchian ngei ding ihiu. Zia gual ah Pathian zangaina muchian tute chun hun chiasa leh tuhin ah ihikhial na te le hepina ei ngaidam zo ngei ding ahi ti hian thamuan na ei pe sek ahi.

Tichun, Pathian nâ chu bangin ei sepsak leh dik ahi diam leh? A man ei hepi masak zia chu in enle ihepi ding ahi, zia hepina chun a thupiak ei zawpsak ding ahi. A hepi nan ei sawl ka cham loin, Lalpa nasep ka kin ahi ti la gual khan.

3. Lal Jesu la hepi leh a belamte vâk in

Jesun ama hepi tute chu a belamte enkawl ah vâk ding in ei dawi ahi. Peter kiang ah thumvei hial lei hepi em

Hinna Vâk

ti adawt lai akhan, ka hepi hi ati sin leh abelamte enkawl leh vâk dingin asawl sek ahi kha. Lei hepi tak tak leh lawi-u-pân hung siam ka ati pua, belamte ading ah ahinna apiak gual akhan eimau le belamte â ding ah hinna pekhawp ah pang dingin ei ki neppi ahi. Lal Jesu hin abelamte ahepi ah ahinna apiak na ahin ama dingin belamte hi lul taka hi ti asuchian ahi. Eimau dinmun lampang sang ah poimaw zaw chu Pathian lungthim ahin a belamte zawk hi ala hi.

Belamte enkawl ah chawm ding ahin pastor te leh upate hi lungthim mitha a chun alian pai sek hi. Adik him a, zia nasem ding ah Lalpan ako te chu ahiu. Maleh midangte hi mawk um ding ahi ta mai diam? I pâk na lau khan kristian tin missionary dingin ei ko ti ahi kha. I dinmun chiat apat ah midang te â ding ah hing dingin Lalpan ei dawi ahi.

Ziaziak achun ama ihapi nau kha belamte â ding ah nâ isepiak nau kingakna

suangphum chu ahia, zia hepina suangphum chung apat chun Pathian zangai na nuai ah ama â dingin nasemtu in ipang thei bep uh ahi.

Thukhakna

Peter inle naupan lai hun leh naupang zia aput lai hun aum hi. Maleh a hung upat phat akhan Thugosia in ei gen dan achun, ka Lalpa kikheden dan gual ah kikhenden tâk le ka hi puai, a bungbu lamin ei khenden un atia, a bungbu lam ah khetden ah um in a thii a tiu a hi.

Pathian zal ah dam hitin, kumkit vel apatin Synod chuam bang le hung nei ta mai ding gualin ikilang ui. Lalpa nasepna lam ahin Peter gual ah piting zia ah ilutto uh angai tai. Eima phulna tiang bep ah Lalpa nasemtu hi vang naupanglai zia ahia, tun chu ikhut zak hitiu in, midangin ei sawlna mun ah Lalpa nasem ding, thi tiang ah ginum ah um ah hinna lallukhuk dawng di te ihi tau hi. Lalpan a thu ei malsawm ta hen.

Zia Valedictory Sermon hi tu ah i Editor, Rev. S. Lama Vaiphei in Munpi Bial ah a umlai ah, Tanggam Presbytery Moderator pawtdawk a hi ah a la sermon kha a hi.



NEHEMIAH

(*Nehemiah 5:15*)

By Rev. C. Lalrinliana
Kangvai Bialtu Pastor

Nehemiah chanchin: Nehemiah pa hi Hakalia a hia, a nau min chu Hanania a hi. *Nehemiah* min umzia hi **Pathianin a thamuan** (*Yahweh Comforts*) tina a hi. Persia lengpa Artezerzia no dawmtu a hi. Ama mimal chanchin lam hi gen ding a tam pua, maleh, nasep thilbawl lam ah chun vang gen ding tam tak a um hi.

Nehemiah Lekhabu Tângpi

Nehemiah lekhabu ah i mu thei uh tângpi chu —

- a) Persia lengpa Artezerzia chun Jerusalem kulbang siamphat ding a phalpiak a, thing tawh ama (Nehemiah) nungzuitu dingte a pekhawm bawk hi.
- b) Nehemiah chun dodâltu 3 a nei ngal a, himaleh a bawl ding chu a bawl tho hi; buaina a hung um thut khak leh tiin *temple police* te le a guatfel diam hi.
- c) *Economic reform*, a sum mu leh matnate'u chu pha takin a saifel hi.
- d) Ni 52 zaw nung in Temple bâng chu siamphat a hi.
- e) Ezra a hung kilang a, Dân Bu (*Pentateuch*) i.e.

Genesis, Exodus, Leviticus, Numbers & Deuteronomy a hung simdawk a, Israel chate chu a hung kilekit ua, Bâwkcha Kût a mang ua, gitlo simna hunpi a mang bawk ua, dan chi chuam chuamte chu siamthak in a um bawk hi.

- f) Kisimna a nei ua, Jerusalem ah cheng zat hechian in, khawsung hotu dingte a guat fel u'i.
- g) Temple sungah nasepna leh thildang dang ah siamphatna nasa takin a sêm hi.

Nehemiah Hina (Character)

- 1) Nehemiah chu Lengpa no dawmtu a hina hin thil thupi tak a kengkhawm hi. Lengpa no dawmtu chu a ginum a ngâi a, Lengpa dawn ding lakah chu gû a um leh umlo

Hinŋa Vâk

enchian (*test*) sek intin, gû chu a la um ta henla hilehle a thi masa ding chu ama a hi. Lengpa kiangah um zing intin, lengpa pawikhawi ding gua ah dawha khaw a um lehle a hiat ngâi a hi. Lengpa hinle a dawisak ma ma hi. Lengpa chu Persia mi a hia, nam dang mi a hi. Himaleh, zia Persia lengpa, Artezerzia chun zia mawpuakna sang tak chu a chipi/nampi te kiangin a pe pua, Juda mi Nehemiah a pe zaw ziang a, mi ginum a hi ngei dan a taklang hi.

Nehemiah hindan apat i zildaw ding ua dawî um masa pen chu a ginumna hi a hi. Nam dang hi ziang lehle a lengpa a hi ziakah chun a ginum ma ma hi. Pathian hin a mite lak ahin mi ginum ding a hawl zing nalai a. Ei uh lak ahin chu, a chang leh ginum a, a chang leh ginumlo ziang thei sek a kitam hi. Kochuam nasepna ah kimang ma ma ziang, hilehle a gûk ah thilphalo bawl ding le khawk sa lo, zu no le dawm ziang thei, numei pawsalna lam ah le

thiangtho lo, nau a pailo ziak bep ah mite hiat ah a thiangtho pen pen gualah um dan thiam ma ma te i la hi khâk sek ziakun Pathian dawisakna i chang thei sek pua'û hi. Pathian chun a kochuamte chu ginum tak hi dingin a dawî a, ziagual mi chu a hawl zing a, a mu phatleh a chawisang sek hi.

- 2) Nehemiah hina lopi tak kit khat chu a sakhaw mina hi a hi. Jerusalem kulbang sia chun ama Babulon khawpi ah, Persia lengpa kiangah umpa chu a subuai pha a hi chu! Jerusalem chu Israelte khan Pathian chenna mun dan in a ngâi ua, a ngâikhawk ma ma u'i. Ei uh le hi leuhin Nehemiah gual ahin i lungthim uh na'ntin, pawna ma ma ngei hitiu. Ahinla, Nehemiah i batlona'û chu ama khan a pawna ma ma a, siampha dingin kal a suandawk ngal a hi kha! Ei uh chu ama gual i hi ngai sek pua'û hi: Kochuam enkawltute hi mihing a kihi ziakun Kochuam ahin fellona, siamphat ding hi a um sek

a, zia a phatlona lai tak chu i mu thei ua, pawlam apat in i gen i gen sek ua, maleh, siamphat ding gua in pan i la ngai sek pua'u a, kal i suan pei sek pua'u hi. A gen ah gen thaw hilo in, a sep ah sep thaw hi a ngâi sek hi.

Nehemiah tawh Israel chate him him khan Jerusalem Temple kha Pathian chenna'n a ngâi ua, siamphat ding chu a tup tin ten uh a hi kha. Ei uh hin Kochuam hi Pathian chenna, Pathian umna ah i ngailo uh a hita diam a phatlona i mu phat ua leh siamphat ding gaw lo in i gensia gensia ziang sek ua, zia hi khawk ka sa ma ma sek hi. Pathian Kochuam ah a phalote haw siampha ding ahin Lalpa'n khanglaite hi ei ko a hi.

3. Nehemiah lawtinna bulpi pen pakhat chu a pauchap tam hi a hi. Nehemiah hin bang thil bawl ding hi henla, bang buaina, bang haksatna tuak ding hitaleh le, a pauchap zel sek hi. Ziagualah zehawi takmai a nei hi Kochuamte hin i ettawn uh a ngâi takzet hi. Pathian be mun ah, ama

ho tam, a kiangah um tam te chu Pathian in a thatham ngai pua'i.

4. Pathian a zâ dan leh a lau dante hi khanglaite'n Nehemiah nun ah i zil ding ua pawimaw tak chu a hi. Neh.5:15 ah i mu'u chu "...ken vang Pathian ka lau ziakin, zia gual chun ka bawl nuam pua'i" ti in hangsan takin a gen ngam a hi chu! Pathian zâna leh launa te hi i tasam ta khawpmai u'i. Ka naupang lai ah chun ka kikhawp phat ua leh kikhawm ah chiate tawh kituak khak ding hi ka lau ma ma sek u'i. Tulai chu ziagual kha hi talo. Hindute gam vel ah i mu gual gual uh kha ei uh lak ah le kimu ta, Biak In hial hial le kisuksiatpiak ngam ta a hi. Hindute lak ah thiltung hileh chu hiatthiam theina nei ingka, himaleh ei Khristiante lakah ziagual thil hung tung ta mai hi vang mak ka sa takzet hi. Pathian zâna leh launa i nei talo him him uh a hi. "Pathian ka zâ ziakin sex ka mang thei pua'i", "Pathian ka zâ ziakin zu ka dawn

Hinŋa Vâk

thei pua'i", "Pathian ka zâ zia kin damdawi ka khawi ngam pua'i" te hi ti thei leuhin chu i Pathian uhi ha kipak in a e!

5. Nehemiah hinkhua apat i zil ding ua pawimaw ma ma kit khat chu a *leadership quality*, puitu a hina hi a hi. Neh.4:14 ah i mu'u a, mipi lungthuai te kiangin a Pathian zui uh lopi zia leh lau um zia te a gen a. Mi a *encourage* thiam a, a chawkphûl thiam a hi chu! Puitu pha chun mite chaw phûl a thiam sek u'i. Kochuam Upate leh kum lam ah upate tiang ahin kitilkho thiam hi a pawimaw ma ma sek hi.

Leader pha a hina chu *administration* (kivaipuak-na) lamin a fel ma ma hi. Jerusalem bâng a siamphatna dingte'u kha a la entha masa sek a, a hechian ma ma a; nasepna ding bik kha kichian leh fel takin a hawm tuak thiam a, tichun, a zo ziang uh a hi kha. Puitu pha tak chu a hi.

Puitu tawh **Hotu** ti hi thil kinai tak, hilehle kikhe ma ma ngâl a hiu a. Hotu chun

"zia saw, zia kha va bawl in" ti'ntin, Puitu chun "zia bawl ding um hi i vak bawl vak diam uh?" ti zaw'n a. Hotu chun mi gensiatna thute buaipi intin, Puitu chun kua'n bangti'n gense leule midang chawkphûl intin, *encourage* sek in a. Hotu chun thil a hikhial phatleh midang ngaw in dem intin, puitu chun vang a hikhialna ah chun maw paw ngam in a. Hotu chun chunglam apat in ensuk intin, puitu chu vang haksatna thuakte dinmun ah um thiam intin, dinmun kibang ah um in, mi gentheite mitval apat in khawvel thil zaw sek in a. Kochuam ah chun hotu hilo in, puitu a kinei zaw sek hi.

Synod i hi ding hun uhi ka vak thillawk sek a, ka phûl ma ma sek hi. Himaleh, lunglana khat ka nei chu Puitu kichuna hi hung um kha'n a ti ka lau sek hi. *Leadership Crisis* a hia, zia chu ka lungkhamna pen a hi. Puitu ah i pan thatnawp dan uhi ka vei khawpmai hi. Puitu ah i pan theina ding uh a hi phawtleh ti ah thilbawl dan diklo tiang tiang ah pan i lâk khâk dinguh ka lau hi. Ravi Zacharias in Nehemiah

chanchin a genna chu, “*Living a Life Used By God*” a ti a hi. “Pathianin a mat hinkhua mang” ti thei in a. Diklo deu hiau ah puitu hina chang i hui chun i nasepna’u chu Pathian in mangcha ngai pua’n a. Tual Upa ah kitêlting ta, kikhawm pei lo, a hina phat diaklo, KKP/KNP puitu ah kiguat, a mawpuakna sêmpiting zolo, damlona leh thina te ziak le hi sâmlô, ngai pawimawlo ziak chauh ah mawpuakna nusia’ mun chuam ah um hiau ziang ti te. I um theilo ding lehle gen ziang ding a hi. I thi phat ua leh “ama hi KKP Leader, Tual Upa, KNP Puitu a la hi sek a hia” a hung ti ding uh ut ziak

“Puitu ah pan thâtnawp ziakah diklo deu ah le pan i lâk khâk ding uhi ka lau hi”

mai mai ah puitu hina i dawi ziak ua hin Kochuam a hing thei pua, Kochuama suthi a hi. Pathian in ei mang lo pi chu! Nehemiah vang Pathianin a mang a, ei uhi Pathian in ei mang em ti kingaitua chiat hitiu.

A tawp pen ah ka gen ut chu Nehemiah chanchin apat a ginum ziate, a sakhaw minate, a pauchap tam ziate, Pathian a zânate, a *leadership*

quality pha tak tak te i mu’u a, a lopi hi. Tulai i khawvel uh, i chenna’u Manipur khawvel hi ka thîl phatleh thim ma ma hi in ka hia, Nehemiah gual hi i mamaw ma ma un ka hia’i. Langkhat lam ah chun Baal ma angah khupdin ngailo gingtu zia zat sêt i um uhi a lungdam um khawpmai hi. Pathian hechian nuam, Pathian mamaw, Pathian â dingah ginum, Pathian hepi ah ngâina ma ma gingtu

bangzat ahem i um uhi lopi ka sa ma ma hi. Hung tiam u, sualna do ding ahin kuandawk hitiu. Lal Jesu ziakah thisan vat khat le sêng khalo la hi chun Lal Jesu thawkna kha ngaitua inla, midang chu a la

ginumlo tâk ua lehle ei uh bêk ginum leh dik tak in a la um hitin uh, Nehemiah gualin, “Pathian ka lau ziak in zia thilphalo te chu ka bawl thei pua’i” ti in hangsang takin masawn ngam leuhin i chung un Pathian lungdam intin; ziagual ah Pathian lungawina ah chun malsawmna tam tak a um ngâl hi.



The Lady

- Rev. Vanlal Ngeiha

Esther 4:13-14 : “*Esther kiang ah a gensawn dingin, ziagual hin a gen tai: “Juda mi zosia manthai zaw nung ah, lengpa In ah nang suakcha diak dingin kigingcha kin. Zia tawbang hun ah hi la thip hiat hiat a hi chun, Juda mite â ding ah panpi’na leh hukdawna khoilam a hem khat ah kipat in hung ngei intin; himaleh, nangma leh la pa Inkuante vang mangthai tho tho ding la hiu. Lengnu la hung pan hi zia gual hun â ding zia hi himaw lo ding ei vei; zia chu kuan he ding a hem?” va ti dingin a sawl kit tai.*”

Kum 1991 ah Nobel Peace Prize a la dawng, ***Iron Lady of Myanmar*** ahiloleh, ***The Lady*** tia a ko sek uh Aung San Suu Kyi, kum 75 mi chu February ni 1, 2021 ah khan mat in a um a. Myanmar Police te chun sawlkar dan in a phallo walkie-talkie radio set 6 gam sungah a laklut zia kah thubu ai bulkhum in, a man tau hi. Zia chu a hi zinglai in, Army General Aung Hlaing chun February 3, 2021 ah khan State of Emergency bei masang tha 6 sung vel ding chu Myanmar gam sung ah vaihawmna leh thuneina zosia a khut ah um ding a hi thu a puangdawng ngal hi.

Suu Kyi hin kum 15 hial House Arrest a la thuak ta; kum 50 tavang hial chu Myanmar gam sungah sepai thuneina hilo ah, mipi vaihawmna sawlkar a hung dindaw theina dingin theitawp sua in a la pang ta a hi. Ningkum November tha ah khan Suu Kyi leh a pawlte chu hât takah têtin a la hita maleu, General Min Aung Hlaing leh a pawlte chun zia kitêlna chu pawm theilo in, dawha thiam takin Suu Kyi chu a man tau a hi.

Election Commission lamte chun zia kitêlna kha dik ma ma hi in a gen u’i. University Lecturer lar tak, Nwe Thazin

chun, “Sawlkar dingah têtin te chauh ka pawm thei u’i; bang hilehle amau chu panpi ding ka hiu” ti in a gen a. “Sepai thahâtna mang ah vaihawmtu chu bangmatik in pawm hi pua’n a” ti in hangsan takin a la gen hi. United Nations (UN) ah puitute leh, USA President thak Joe Biden ngei inle Suu Kyi chu a panpi ma ma ziang ua, a hung thadawna dingun theitawp sua ding a hi dan uh a gen bawk u’i.

Suu Kyi hin a gam damna ding leh a mite zalenna ding ahin bang hilehle a thuak ngam a, a hinna hial le a pia ngam a hi chu! Suu Kyi pa, Aung San hi Kumpinu apat Myanmar gam â dingah zalenna a la sualdaw zaw nung, tha 6 zaw vel bep ah khan kizâna him him umlo in thalup in a um a. A lunggul ma ma mipi zalenna chu a chanu, Suu Kyi hin bangcheng huam in, sukpitin a hi theina dingin nasa takin a hung bei to zel hi. Sepai thuneina paithak ding a tupna ziak ahin a pawsal, Michael Aris a la chên ta, a hepi ma ma a chate tawh le khendanna a thawk khawlaw ta a hi.

Himaleh, a hepi gam Myanmar â dingah a pan det ma ma ziakin a tawp tawp in sepai thuneina chu suktawp in a hung um thei ta, tichun Myanmar chu Democracy gam a hung hi ta a hi kha. A khawnung takin suangkul ah khum in hung um kit ziang ta maleh, “Iron Lady” a ti hial nu’u chun a gam uh â dingah a kipiakzaw zelna chun khawvel mite hiat thei ding in “gam leh nam hepina thu” a zilsak zing hi.

Aung San Suu Kyi tawh Bible ah i mu’u Esther hin kibatna tampi a nei u’i. Esther khan le a chi leh nam â dingin beidawna leh haksatna nasa tak a thuak a hi kha! A sênlai apat a la enkawl seiliantu Mordekai chungah Haman a lungnat ma ma khawlaw a; tichun, a zi thuhilna gualin tawng sawmnga hial ah sang in Mordekai khailupna ding a siam ta a hi (Est.5:14).

Himaleh, a hun takah Pathian in pilna leh lemhiatna a piak mangin Esther chun Mordekai bep hilo, a chi leh nam Israelte zosia chu

Hinṇa Vâk

a hukdawk hi ti i hia chiat u'i. Hangsan takin lengpa a mâitua a, pil takin guanggalna a siam a, dawthei takin Pathian thilhitheina a ngâkdawk a hi kha. Haman chule a thâng kamah awk in, Mordekai khailupna dingah a siam ah chun a khailum tau a hi kha (Est.7:10).

Aung San Suu Kyi tawh lengnu Esther gual ahin gam

leh nam phatsantu hilo in, gam leh nam hepitu dik tak hi gua'itui. A pawimaw chun thawk le khawksa lo gingtu hi gua zing hitui. I ginna'u ah hangsan leh det takah i din zel ua chun Pathianin hung thamuan intin, i ma ang ua dogâlte leh gûkkheuna ten um tak takte chu zo in paltheng hitin uh, a tawp ah zotu chu hi mai ding i hui.

**Myanmar gamah sepaite'n diklo
takah gam thuneina chû ah mâ a
lak zing ziak ua taksa leh thagau ah
i suapite'u leh gam mipite'n nasa
takin a thuak ua; beidawna leh
haksatna tam tak a thawk dante'u
hezing in, i pauchapnate'u in
Pathian kiangin dawtpiak sek hitui
ti in i kichial uh a hi.**

KUVA HIH!

~ Dr. Thangchungnunga

Kuva hi i ne nasa ma mau ah, kei ngei hinle nikhat ah ` 30/- man ka nezo sek hi. Tukum apatin ka ne ta puai. Kuva phatchuamna hi a tawm khawpmai hi.

Kam namse talua ding a veng tilo chu sepphat dang a um bek puai. A phatlonu chu, i vak thai ah, i thai zing lai chun thuak hin gilpi kiang in dianip deu ngai hung ketha ding a hi ti information a la pia, tumpi chun a acid (HCl) a la pawt tam sak hi.

Maleh a kinep gual a khan hung ketha ding mumal a um taklo ziakin gilpi sung a khan acid a umsa sang ah tam a kikhawlkhawm ta. Tichun gilpi kha acid ah kidia in, gilpina, gilpi ulcer i tiu chuh a hung piang mai sek hi.

Chun, kuva leh a dua hin damdawi (chemical) thigui su neu theitu a kawl a, nek tam chun mit ha hile a fialo thei a, luchang le a nat khawlaw thei bawk hi.

Chuleh, sunu i nekkhawm pen uhi a sial, heldau nailo hi ahia, zia hin i anneknu ah iron (thisan san saktu) hi taksa'n a hip theilo dingin Ferrous Oxide (thik tuiek sia) in a siam zel a hi. Kuva netam him him chun iron taksapna (Iron Deficiency) a nei sek u'i.

La thisan Hb a niam zing ah, kuva la nek zing bawk a hi chun, kuva nek kha haisan lechun damdawi a hi mai hi.

Hinŋa Vâk

Tichun sunu ah calcium um hi mi tamtak in taksa a ding ah pha dingin a ngai ua, ek sukhal mai mai a hi. Gilpi ah acid khan Calcium hawilo a siam a, ekkhal in ei su buai bep a hi.

Chuleh, kuva hi acid inle a dianip zo tak tak pua'i ti ka hiatna chu, kum 1985 khan Biате-ah thing at in mi ka guai ah, thani a um sung ua a kuva nek nau kha ekthakna bik a nei zia k un a la kisung vum mai hi. Niksa kawhawm bul ah leisai vum gual ahin (ek zosia kumkhat nung a chun a la thiang ta) a la kisungvum mai a, kg 2 vel hial a ting hi. Kuva chang nen a hi ti chu hiatthei a hi nalai hi.

Tichun, kuva dua ah chemical chikhat thigui suneu thei a um a, a thumchi haw vang hin Allergy a siam nuam ma ma bik hi. Neklo mai hi a pha pen hi. Kausia mi pet gual ah kam san zengzung ah um hi a mawilo baw k hi.

(Zia article hi *Hriselna Huang* apat lakdaw a hi)

*“Nangmau chu Pathian chênna In leh, Pathian
Thagau chênna la hiu ti helo la hiu em?”*

*Kua'n le Pathian chênna In chu a suksiat chun,
ama chu Pathian inle susia ding a hi. Pathian
chênna In chu a thiangtho ah, zia In chu nanmau
la hiu hi.”*

- 1 Korinth 3:16-17

February 2021

MIZORAM PRESBYTERIAN KOCHUAM
(Presbyterian Church of India)
MANIPUR AREA

KOCHUAM NUMEI PAWL
KIKHAWMPI LIAN 12-VEINA
2021

PROGRAMME

A mun : *Jubilee Kochuam Biak In*
A hun : *March 5, 2021*
Thupi : *“La khut ah um kha bang a
hem?” (Ptd.4:2)*

PUITUTE

Chairman : Pi Neikhovak
Vice-Chariman : Pi Niangphal
Secretary : Pi Hoilian
Assistant Secretary : Pi Thuamkim
Treasurer : Pi Hatthiannei
Finance Secretary : Pi H. N. Sangkim

March 5, 2021 (Simhaini)

10:00 a.m. - 12:00 p.m.

VAIHAWMNA

12:00 p.m. - 12:30 p.m.

Thingpi Dawn Hun

Hinṅa Vâk

12:30 p.m. - 02:00 p.m.

Kitêlna

02:00 p.m.

Thagau Lam Thupi Leh Puitu Thakte Latna Kikhawp

Puitu : Pi Neikhovak, Chairman,
CKNP

Thugentu : Rev. R. Lalmingsanga,
Administrative Secretary

Thupi : “La khut ah um kha bang a
hem?” (Ptd.4:2)

Puitu thakte latna &
Pauchap piakna



**REV KHUALZAKAP
(1948 - 2021)**



Rev. Khualzakap hi Pu Hentinkhai (L) leh Pi Gawikhawdim (L) te cha palina (4) hi ding in Mualkawt (Churachandpur Dist.) khuaah ni 1.1.1948 ah a la piang hi. Unau pianpi pawsal 9 leh numei 3 a nei a hi. Kum 1967 in Pi. Tingkhawlhing (L) tawh a kicheng ua, cha pawsal 2 leh numei 2 an nei ui. Vangsiat um tak in takin 1982 ah a zi chun a thihsan a. Kum 1984 ah hin Pi. Tingtuakim a nei kit a, cha malsawmna pawsal 2 leh numei 3 a nei kit u'i.

Kum 1978-80 sung hin Dinwindie Memorial Bible School (NEIG Mission) ah Rev. K.T. Amos (L) Principal na nuai ah Certificate of

Theology (CTh) a zil a, Vernacular Diploma course pha tak in a zo thei hi.

Kum 1993 ah Revival Church of God (R.C.G) kochuam ah Evangelist na a sem pan a. Kum 1998 ah Probationary Pastor hi ding in namdet a hi. Kum 1999 ah Pastor nasep sem ding in Rev. Kamlam Vaiphei in Revival Church of God, Kangvai kochuam ah a namdet (ordain) hi. Kum 2002 apat in Mizoram Presbyterian Kochuam, Manipur Area, ah sem pan a, a pension (2008) tiang in ginum takin Pathian nasepna a sem a hi. Pastor a hi sung in zia anuai ah taklat Bial te a hin a sem hi.

Kangvai Pastor Bial - kum 2002 - 2006

Lamka Pastor Bial - kum 2007
Sugnu Pastor Bial - kum 2008

Suangpha Pastor Bial hi Sugnu a bial lai ah a puak khawm a hi.

Pastor na a sep lai in mi 447 a baptis a, nupan tuak 71 a kichen sak hi.

Kum 2002, April tha hi a Pastor law a lak masak pen ni

Hinŋa Vâk

ahin, kipak ta lua chu Pathian chawihawi in “Halleluia” thum vei hial samin a kiko hi. Chun, Kangvai Presbyterian Biak In hi ama panlakna a sak pat a hi. Ama hi thing mistiri thiam tak a hi zia in theihtawp sua in, a thiam leh theihna te hi Biak In sak na in a mang hi. A lehkha sim peina leh a sim gun chu nate hi ama hinkhua ah entawntak tak ahi bawk hi. Kangvai Pastor Bial ah hin ama panlakna zal in Presbyterian Women Fellowship leh Presbyterian Youth Fellowship te hi din pat ahi bawk hi. Chun, Kochuam chiadan(kalphung) ngai pawimawh mi ahi, hangsan takin a chia pia in a zilti a, mi huat na tiang a law hi. Mi taima, Pathianthu duh leh a kochuamte ngai pawimaw mi a hi, damlo leh taksa nuam lo chung chung in le, a bial fan di a thul ngai puai. Sunghat lo leh ek kho(dysyntery) hi chung chung in le, damdawi leh ama kisuk thian na di chawi in a mawpuakna a sem mual sua ham ham sek hi.

Kum 2000, February tha a khan a inchung khu na in a ke

tha pal ah, a nakhang hiatna a chau pha hi, zia hin a nasepna ah nasa takin a su buai hi. Chun, amah hi a naupan lai apat mi hisel lo leh natna nei deu zing mi ahi. Asthma te hun nei in, damdawi ah ki etkawl zing ahin. Ni 25.01.2021 ahin B.P. stroke hun nei thut in, District Hospital ah pui ahin, doctor leh nurse ten a theihtawp sua a, a etkawl nung un Ni 26.01.2021, dak 6:30 p.m. ah a na a seppiak Pathian kiang in ei chawldam san tai.

*Upa Kaiminthang
Kangvai Kochuam Ziaktu*

UPA LAMKHAWKAM (1945 - 2021)



Upa Lamkhokam @ L. Kama hi famta Pu Tongkhaw-sat leh Pi (L) Deinem te gil ah ga 4na hi in June 30, 1945 kum in Kawlhen khu'a n a piang a. Thiamzilna lam ah Class IX,

RMHS in a la zo hi. 1968 kum in Nu Thianting tawh kicheng in gil a ga malzawlna chapa 6 leh numei 4 a nei u'i. (A pianpi numei 6 leh pawsal 5 a hiu).

Missions ah a sep kumte:

EOC Evangelist Teacher:
1984 - 1994

Asepnamunte: Mualhoichiang, Leikawt, Maite, K. Tuiliphai.

EOC Bookroom Manager:
1995 - 1997

Muanna Aksi Circulation
Manager: 1998 - 2001

Evangelist: 2001 - 2005

A sepna munte: Lamka nuai Bial; Central District; Lamka chung Bial; Meitei Missions Field, Keibul Lamjao.

October 11, 2009 ni Joint Presbytery Khawmpi'n, Kangvai Kochuam Upa hi ding in Rev. Laldingluaia'n a namdet hi.

Kochuam ah mawpuakna a neite

Kochuam Secretary, Finance Secretary, Gamthak Secretary leh Bial Committee leh, Anchangham Ziktu'n a la pang hi.

Hun sawt tak asthma (awmna) thuak ah doctor ah ki-enkawl zing a hi lai in, December, 2020 apat in hung khawkse deu deu in date 08-01-2021 ni zingkal 08:00 a.m. in a ngai cheng a insung mite leh Kochuamte nusia in kumtuang gam ei la zawtsan ta'i.

Date 08-01-2021 ni ma in In apat thâkdawna Rev. C. Lalrinliana, Bialtu Pastor in nei in, Biak In lam ah Rev. S. Mangminthang, Moderator, Lamka North Presbytery in hun mang in, thân ah Rev. S. Khaikhawlam in hun mang in vuiliam a hi.

~ Upa Kaiminhang
Kangvai Kochuam Ziaktu

“...Pathian in a mit ua kipat mitthite chu thiak hul ta'n tin; thina um ta pua'n tin, lungngainate, kânate, natnate le um ta pua'n a...”

(Thupuandawk 21:4)

Editor : Rev. S. Lama Vaiphei, Co-ordinator

Joint Editors : Rev. R. Lalmingsanga, A/S
: Rev. K. Jama Vaiphei
: Rev. Hesei Vaiphei
: Rev. Th. Samuel Vaiphei
: Upa Lalminsang
: Upa S. Lalpi
: Pi Hoilian, Secretary, CKNP
: Upa Lalthuoisang, Secretary, CKKP

Business Manager : Pu Lalbiaklian, A/S Office.
MPCS Office D. Phailian
P.O. Box 107 CCPur-795128 Manipur
Phone No. +91 9089623251
Email - mparea@gmail.com

Kum khat lak man : Rs. 100.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. Editorial	01
2. KOCHUAM HUANG	02
3. SERMON	
a) Khrista Gingtu	07
b) Nanghaw le chiamang la nuam puau em?	12
c) Lal Jesu Hepi leh a Nasep	18
4. CHARACTER STUDY - <i>Nehemiah</i>	22
5. GENERAL ARTICLE - <i>The Lady</i>	27
6. HISELNA HUANG - <i>Kuva Hih!</i>	30
7. CKNP Kikhawmpi Lian 12-veina Programme	32
8. SÛNNA	34

Hinna Vâk ah thu kisua zosia hi Editor ngaidan a hi suak puai

PRINTED AT : MODERN OFFSET PRINTER

PAUCHAPNA HIAT DING

1. Manipur Area Kochuamte'n Pathian dawigual ah ma i sawn zel theina dingun.
2. Kochuam Ni Pawimaw - Palm Sunday, Good Friday, Easter Sunday te navak leh lawting takah Kochuamte'n i mat chiat theina dingun.
3. Manipur Area sungah Kochuam Upa, Pastor leh Kochuam Committee member chuam chuamte'n Pathian Thagau Thiangtho puina gualah Kochuamte a puihuai zel theina dingun.
4. Central Khristian Khanglai Pawl (CKKP) Vaihawm Kikhawp lawting leh navak takah mat a hi theina dingin.

